

Boh Youq Diegrog Miz Mbwkyoux

父亲在外有女友

□ Yen Byauh / 彦飙

Boux riengz laeng de haenx couh dwg Veiz Yenbingz, Veiz Yenbingz daj ngoenz raen boux hauxseng da naj lumj daxboh de, couh haengjdingh boux hauxseng neix dwg daxboh caeuq mehmbwk wng seng. Vih ra daengz baengzgawq, Veiz Yenbingz gyajcang naeuz ciheij maranz, saedcaih laeglemx riengz laeng daxboh, yawj daxboh de bingzciengz bae raen byawz.

Gvaq le diemj cung ndeu, Veiz Yenbingz riengz laeng daxboh de ma daengz aen mbanj ndeu, boh de haeuj ranz bae le, de hix laeglemx haeuj ranz bae. Laeglemx yawj haeuj ndaw bae, Veiz Yenbingz yawjraen boux hauxseng ngoenzhaenx gai dangzrwi haenx, lij miz naih mehmbwk 50 bi baedauq ndeu ninz gwnz mbonq. Mwhhaenx, daxboh doiq hauxseng naeuz: “Mboengqneix, gij bingh daxmeh mwngz lai ndei di ba? Gij doxgaiq neix louz hawj sou, gwn ba!”

Veiz Yenbingz youq luengq rog dingqnyi gij vah neix, couh cienzbouh rox lo. Yenzlaiz daxboh caen dwg youq diegrog ciengx mbwkyoux, itseiz, de saet gij laex, cung haeuj ndawranz bae, ciengj aeu gij doxgaiq ndaw fwngz daxboh, vit roengz dieg bae, daihsing rongx: “Yenzlaiz cungj dwg caen, mwngz caeux couh youq diegrog miz mbwkyoux, miz lwgmbauq, daxmeh gou dwg baenzlawz dai gou rox lo. Gou

haemz dai mwngz lo!” Vunz ndawranz cungj hawj Veiz Yenbingz gij vah neix haep lau liux lo. Veiz Yiz gik ndaej naj heu caez, naeuz: “Mwngz baenzlawz lo, vihmaz baenzneix?”

Dingz ndaej yaep ndeu, Veiz Yiz couh naeuz: “Gawqyienz mwngz cungj rox lo, couh hawj mwngz rox gij saedsach ba!” Veiz Yiz couh fwngz vix daeg hauxseng naeuz: “De dwg daeggo mwngz, coh heuh Veiz Damingz, boux ninz youq gwnz mbonq dwg mehciengx daeggo mwngz.” Ciepdkw, Veiz Yiz couh gangj gij saeh 20 geij bi gaxgonq okdaeuj.

Yenzlaiz, Veiz Yenbingz mbouj dwg daeglwg Veiz Yiz caenseng, Veiz Damingz cijdwg daeglwg Veiz Yiz caenseng.

20 geij bi gaxgonq miz ngoenz ndeu, Veiz Yiz caeuq mehyah daiq daeglwg Veiz Damingz bae haw caemz. Youq gwnz roen maranz raen miz daeg lwgnding deng vunz vit youq henz roen, gvanbaz aenvih ndawranz ginghei gunnanz, mbouj gamj gip lwgnding neix daeuj ciengx, hoeng daeglwg ngamq ndaej 5 bi Veiz Damingz rag fwngz bohmeah aeu dawz lwgnding haenx maranz ciengx. Veiz Yiz gvanbaz couh yienghneix dawz lwgnding neix umj dauqma ciengx, an mingz guh Veiz Yenbingz.

Hoeng, mwh youq Veiz Yenbingz ngamq ndaej bi ndeu seiz, ndaej cungj

bingh geizheih ndeu, song gvanbaz mbouj miz ngaenz yw, couh ra daengz laenzgaenh mbanj boux canghyw ndeu. Boux canghyw neix naeuz: “Yw ndei gij bingh mbouj aeu cienz, hoeng, aeu daeglwg 5 bi sou daeuj guh lwgciengx gou. Danghnaeuz gvanbaz sou mbouj doengzeiq, couh mbouj yw bingh lwg neix.”

Seizhaenx, Veiz Yenbingz mbouj ndaej gibseiz yw bingh, couh yaek dai lo. Baenzlawz banh? Mbiengj ndeu dwg lwg caenseng, mbiengj ndeu dwg lwgciengx ciengx ndaej bi ndeu. Couh youq seiz gip neix, Veiz Damingz lumjbaenz yawj rox gij simsaeh bohmeah, hamz raemxda gangj: “Caenh aeu yw ndaej bingh daegnuengx, gou nyienh guh lwgciengx songde.” Yienghneix, gij bingh Veiz Yenbingz yw ndei lo, Veiz Damingz hix baenz lwgciengx boux canghyw, gaij mingz guh Cinz Damingz.

Mbouj geij nanz, daxmeh Veiz Damingz aenvih siengj lwg daiq lai baenzbingh gvaqseiq lo. Veiz Damingz bi siujyoz bizyez seiz bohciengx hix baenzbingh gvaqseiq lo. Mehciengx ndangdaej itcig mbouj ndei, Veiz Damingz aenvih ranz hoj couh mbouj bae doegsaw lo. Veiz Yiz soengq Veiz Yenbingz doegsaw, doiq Veiz Damingz couh goq mbouj ndaej lo.

Veiz Yenbingz gauj hwnj dayoz bihaenx, Veiz Yiz hix mbouj miz cienz

soengq lo, mbouj siengj hawj Veiz Yenbingz hwnj dayoz. Hoeng, Veiz Damingz rox le mbouj doengzeiq, dawz gij ngaenz ciheij comz yaek aeu yah laeglemx hawj Veiz Yiz soengq daegnuengx hwnj dayoz, gij saeh neix Veiz Yenbingz coengzlaiz mbouj rox. Veiz Damingz mbouj miz ngaenz, mehciengx youh ciengzgeiz baenzbingh youq mbonq, mbouj miz saek dahsau nyienh haq hawj de gvaq saedcej hoj, ndigah daengz seizneix de lij caengz aeu ndaej yah.

Veiz Yenbingz dayoz bizyez le miz hong miz souhaeuj, Veiz Yiz dawz gij ngaenz Veiz Yenbingz bingzseiz hawj mbaet roengzdaeuj, boiz hawj Veiz Damingz, gij buhvaq haenx couh dwg de aeu bae gai ndaej ngaenz le hawj Veiz Damingz.

Gizsaed, Veiz Yiz mbouj nyienh bae ndaw singz riengz Veiz Yenbingz caemh youq, caencingq yenzynh dwg mbouj cuengqsim Veiz Damingz ya!

Dingq gij vah daxboh le, Veiz Yenbingz lumj loq ngamq singj nei, fouzfap nyaenx simcingz gikdoengh, rag fwngz Veiz Damingz rongx dwk naeuz: “Go, cungj dwg aenvih gou, mwngz cij deng baenzlai haemzhoj ya!” Gangj dwk, caeux couh raemxda laebyoegbyoeg, gangj mbouj baenz coenz.

(sat)

Ranzmbanj Bienqvaq Hungloet

家乡变化大


□ Luz Mungciuh / 陆梦秋

Seizneix, ndaw mbanj gou bienqvaq hungloet, ndaem miz haujlai faex haujlai va, diuzdiuz roen cungj aeu suijniz guh baenz, dauqcawq ndei byaij raixcaix. Hoeng, mboujcaengz gaijgwz hailangh seizhaenx, mbanj gou mbouj dwg yienghneix.

Ndaej geiq, gou lij iq seizhaenx, ndawranz cien gungz fanh gungz, ciengzseiz baenz ndwen mbouj miz saek gaiq noh gwn. Daxboh caeuq daxmeh haet hwnq vaiq ok rog guhhong, haemh maranz laeng. Gou caeuq daegnuengx miz mbanj baez iek mbouj miz gwn, song boux iq cij ndaej gag cawj souh. Daxmeh ngoenzngoenz guhhong sinhoj le, ma daengz ranz mbouj haengj gangj vah geijlai. Daxboh gueng mou le, gwn vanj haeux, couh vaiq bae ndaw naz gonh raemx lo. Dou cei q haengj fwn doek, fwn doek gwnz loh miz haujlai raemx, dou couh caij raemx angq

raemx, angq dwk buhvaq mbaeqmboetmboet. Daxboh daxmeh coengz lai mbouj ndaq dou gvaq, aenvih gyoengqde caen sinhoj, mbouj miz seizgan guenj dou.

Ndawranz haemzhoj baenz haujlai bi, bohmeah gou sinhoj haujlai bi. Miz baez ndeu, yangh cwngefuj daeuj mbanj dou son vunzmbanj gohyoz dajndaem, bohmeah gou ndaejnyi, couh bae hag. Bi daih’ it, couh gai byaek canh ndaej 50000 maenz. Daxboh naeuz hawj bohlungz yangh cwngefuj gij gohyoz dajndaem ndaej canh ngaenz. Ndaw mbanj vunz boux cienz boux, gyoengqvunz cungj gaen bae hag gij gisuz neix. Mizmbangj ndaem mak, mizmbangj ndaem haeux, mizmbangj ndaem byaek. Ciemhciemh, ndaw mbanj vunz bouboux swngghoz suijbingz daezsang lo, gak ranz cungj cawx ndaej noh gwn, miz buh moq vaq moq daenj.



Raemxdah heux aijsa.

Goh Cungdingz ingi

Ausam gou cawx ndaej aen dohlahgih, hwnq ndaej sam caengz laeuz, caiq aeu ndaej yah gyaundeih ndeu. Buzsam angq raixcaix.

Miz yangh cwngefuj daiq mbanj dou gohyoz dajndaem, vunzmbanj swngghoz caen bienq ndei. Seizneix mbanj dou bouboux cungj ndaej hwnq ranz moq, miz ci q. Bouboux cungj mbouj yungh guhhong, lwngyez

couh miz vunz daiq. Bi’ gvaq youq mbanj dou hwnq ndaej aen yozyau hung ndeu, lwngyez doegsaw gig fuengbienh.

Gou caen docih dangj caeuq cwngefuj, hawj gij swngghoz suijbingz mbanj dou ndaej daezsang. Bouboux cungj yiengjsouh daengz gij ndeicawq gaijgwz.